

四庫全書

子部

欽定四庫全書

子部  
冊府元龜卷二百七十五

詳校官中書臣涂日煥

員外郎臣牛稔文覆勘

總校官庶吉士臣何思鈞

校對官學正臣李巖

謄錄監生臣李如梓

欽定四庫全書

冊府元龜卷二百七

宋

王欽若等撰

閏位部

恩宥

恩宥

書曰文王作罰刑茲無赦故有國者哀其下民觸法抵  
禁乃有赦焉蓋與人更始而開自新之路也自吳蜀創  
國江左建號或易姓革命之始出師飲至之辰日蝕地

震之變立後封子之慶莫不推恩肆眚以流惠澤乃有一歲至于再三者此又數而失中非御民之術也諸葛武侯有云劉景升李玉父子歲歲赦宥何益於治斯實鉅賢嘉話可垂世而為戒矣

蜀先主章武元年四月丙午即皇帝位於成都武擔之南是月大赦改元

後主建興元年五月襲位於成都大赦改元

延熙元年正月立皇后張氏大赦改元

六年十一月大赦

臣欽若等曰自此已下不書降赦因依者史氏闕文

九年秋大赦

臣欽若等曰自此已下不書月者史氏闕文

十二年四月大赦

十四年冬大赦

十七年正月大赦

十九年元子瓚為新平王大赦

二十年大赦

景耀元年史官言景星見於是大赦改元

四年十月大赦

炎興元年夏大赦改元

吳大帝權黃武三年八月赦死罪

黃龍元年四月丙申南郊即皇帝位是日大赦改元

三年十二月丁卯大赦改明年元為嘉禾

嘉禾二年正月詔曰朕以不德肇受元命夙夜兢兢不  
遑假寢思平世難救濟黎庶上答神祇下慰民望是以  
眷眷勤求俊傑將與戮力共定海內苟在用心與之偕

老今使持節督幽州領青州牧遼東太守燕王

公孫淵也

久

脅賊虜隔在一方雖乃心於國其路靡緣今因天命遠遣二使欵誠顯露章表殷勤朕之得此何幸如之雖湯遇伊尹周獲呂望世祖未定而得河右方之今日豈復是過普天一統於是定矣書不云乎一人有慶兆民賴之其大赦天下與之更始其明下州郡咸使聞知特下燕國奉宣恩詔令普天率土備聞斯慶

赤烏三年四月大赦

五年正月立子和為太子大赦

八年八月大赦

十年十月赦死罪

大元元年五月立皇后潘氏大赦十一月大赦

神鳳元年二月大赦改元

廢帝亮建興元年四月即尊號大赦改元

二年十月大饗武衛將軍孫峻伏兵殺大將軍諸葛恪  
於殿堂大赦



太平元年十一月己酉大赦改元

二年四月臨正殿大赦始親政事

九月甲申大赦時吳侯基在內盜乘御馬收伏獄亮問侍中刁玄曰盜乘御馬如何玄對曰科應死然魯王早終惟陛下哀原之亮曰法者天下所共何得阿以親親故耶當思惟可以釋此者奈何以情相逭乎玄曰舊赦有大小或天下亦有千里五百里赦隨意所及亮曰解人不當爾耶乃赦宮中基以得免

景帝休永安元年十月即位初御正殿大赦改元

五年八月戊子立子暉為太子大赦

七年正月大赦七月壬午大赦

後主皓元興元年七月嗣位大赦改元

甘露元年四月蔣陵言甘露降於是改年大赦

寶鼎元年八月所在言得大鼎於是改年大赦

二年春大赦

建衡元年十月大赦

二年大赦

三年監軍虞汜蒼梧太守陶璜破交阯擒殺晉所置守將九貞日南皆還屬大赦

鳳皇元年八月樂鄉都督陸抗平西陵取步闡大赦

二年九月改封淮陽為魯東平為齊又封陳留等九王凡十一王大赦

天冊元年吳郡言掘地得銀長一尺廣三分刻上有年月字於是大赦改元

天璽元年吳郡言臨平湖自漢末草穢壅塞今更開通  
長老相傳此湖塞天下亂此湖開天下平又於湖邊得  
石函中有小石青白色長四寸廣二寸餘刻上作皇帝  
字於是改元大赦

天紀二年七月立成紀等十一王大赦

四年春立中山代等十一王大赦

宋高祖永初元年六月既受晉禪設壇于南郊告天禮  
畢備法駕幸建康宮臨太極前殿詔曰夫世代迭興承

天統極雖遭遇異途因革殊事若乃功濟區宇道振生  
民興廢所階異世一揆朕以寡薄屬當艱運藉否終之  
期因士民之力用獲拯溺救世撥亂寧民業未半古功  
參曩烈晉氏以多難仍邁歷運已移欽若前王憲章令  
軌用集大命于朕躬惟德匪嗣辭不獲申遂祇順三靈  
饗茲景祚燔柴于南郊受終于文祖猥當與能之期爰  
集樂推之運嘉祚肇開隆慶惟始思俾休嘉惠茲兆庶  
其大赦天下改晉元熙二年為永初元年賜民爵二級

鰥寡孤獨不能自存者人穀五斛逋租宿債勿復收其  
有犯鄉論清議賊汙淫盜一皆蕩滌洗除與之更始長  
徒之身特皆原遣亡官失爵禁錮奪勞一依舊準

八月立王太子義符為皇太子詔曰朕承歷受終猥饗  
大命荷積善之祚藉士民之力七廟備文率繇令範先  
後祇嚴獲遂宣訓烝嘗肇建情敬無違加以儲宮備禮  
皇基彌固國慶家禮爰集旬日豈予一人獨荷茲慶其  
見刑罪無輕重可悉原赦限百日以今為始先因軍事

所發奴僮各還本主若死亡及勲勞破免亦依限還直  
二年正月辛酉親祠南郊大赦天下

三年正月甲辰朔制罪無輕重悉皆原降四月己未帝  
以疾瘳大赦天下

少帝以永初三年五月癸卯即位大赦

景平元年正月己亥朔大赦改元文武進位二等七月  
以早詔赦五歲以下罪人

文帝元嘉元年八月丁酉於中堂即皇帝位大赦改元

文武賜位二等逋租宿債勿復收

二年正月丙寅親祠南郊大赦天下

三年正月荊州刺史謝晦反帝親率六師西征大赦天下  
閏正月丙戌皇子劭生二月乙卯繫囚見徒一皆原  
赦

四年正月乙亥朔曲赦都邑百里內二月行幸丹徒三月  
丙子詔丹徒五歲刑以下皆悉原遣

六年三月丁巳立皇子劭為皇太子戊午大赦天下賜



文武位一等

八年六月乙丑大赦天下

十年正月己未大赦天下孤老六疾不能自存者人賜穀五斛七月曲赦益梁秦三州

十一年四月梁秦二州刺史蕭思話破氐楊難當梁州平五月丁卯曲赦梁南秦二州劔閣北

十二年正月辛酉大赦天下

十三年三月己未司空江州刺史檀道濟有罪伏誅庚

申大赦天下

十四年正月辛卯親祠南郊大赦天下文武賜位一等  
孤老六疾不能自存者人賜穀五斛

十六年十二月乙亥皇太子冠大赦天下

十七年十月戊子前丹陽尹劉湛有罪伏誅大赦天下  
文武賜爵一級

十九年四月甲戌帝以久疾愈始奉酌祀大赦天下

二十一年正月己亥大赦天下詔諸逋債在十九年以

前一切原除去歲失收者籌量申減尤弊之處遣使就  
郡縣隨宜賑卹凡欲附農而糧種匱乏者竝加給貸

二十三年四月丁未大赦天下

二十四年正月甲戌大赦天下文武賜位一等囚繫降  
宥逋負寬減各有差孤老六疾不能自存者人賜穀五  
斛

二十六年二月車駕陸幸丹徒謁京陵二月丁巳詔曰  
朕違北京二十餘載雖云密邇瞻塗莫從今因四表無

塵時和歲稔復獲拜奉舊筮展罔極之恩饗讌故老申  
追遠之懷固以義兼於桑梓情加於過沛永言慷慨感  
慰實深聿宣仁惠覃被率土其大赦天下復丹徒縣僑  
舊今歲租布之半所經縣蠲田租之半二千石官長竝  
勤勞王務宜有霑錫登城三戰及大將戰亡之家老病  
單弱者普加贍卹遣使巡行百姓問所疾苦孤老鰥寡  
六疾不能自存者人賜穀五斛

二十七年十一月丁未以魏軍來侵大赦天下

二十八年十一月壬寅曲赦二兗徐豫青冀六州

孝武帝以元嘉三十年正月自武陵王舉兵向闕誅元  
凶劭四月己巳即位於新亭大赦天下文武賜爵一等  
從軍者二等賊汗清議悉皆蕩除高年鰥寡孤幼六疾  
不能自存者人賜穀五斛逋租宿債勿復收長徒之身  
優量降宥五月克定京邑元凶劭及諸同逆伏誅甲午  
曲赦京邑二百里內竝蠲今年租稅

孝建元年正月己亥朔親祠南郊改元大赦天下七月

丙申朔日蝕丙辰大赦天下文武賜爵一級逋租宿債  
勿復收

二年六月甲子以國哀除釋大赦天下

九月詔曰國道再屯艱虞畢集朕雖寡德終膺鴻慶惟  
新之祉實深百王而惠宥之令未殊常渥永言勤慮寤  
寐載懷在朕受命之前凡以罪徙放悉聽還本犯釁之  
門尚有存者子弟可隨才署吏

三年正月壬子立皇太子妃何氏甲寅大赦天下

大明元年正月辛亥朔改元大赦天下賜高年孤疾粟帛各有差

二年六月丙申詔曰往因師旅多有逋亡或連山染逆懼致軍憲或辭役憚勞苟免刑罰雖約法從簡務思弘宥恩令驟下而逃伏猶多豈習愚為性狃惡難反將在所長吏宣導乖方可普加寬申咸與更始

三年七月己巳克廣陵斬竟陵王誕辛未大赦天下

臣欽

若等曰誕為司空南兖州刺史有罪賤爵誕不受命據廣陵城反至是誅之

四年正月乙亥躬耕藉田大赦天下尚方繫囚及逋租宿債大明元年以前一皆原除力田之民隨才叙用孝弟義順賜爵一級孤老貧疾人穀十斛藉田職司優加霑賚百姓乏糧種隨宜貸給十二月辛巳幸廷尉寺凡囚繫咸悲原遣丁未幸建康縣原放獄囚

五年二月癸巳閱武詔曰頃化弗能字而民未知禁道役違調起觸刑網凡諸逃亡在昧爽以前悉皆原散已滯囹圄者釋還本役近籍新制在所承用殊謬實多可



普更符下聽以今為始若先已犯制亦同蕩然

七月曲赦雍州九月行幸琅邪郡囚繫悉原遣

六年正月辛卯親祠南郊是日又崇祀明堂大赦天下

七年二月帝巡南豫南兗二州壬寅詔曰朕受天慶命

十一年於茲矣憑七廟之靈獲上帝之力禮橫四海威

震八荒方巡三湘而奠衡嶽祀九河而簡云岱今恢覽

功成省風畿表觀民六合蒐較長州騰砂飛礫振嶽盪

海星鳥合序攝提協節入獻鬯典饁獸傾郊敬舉王公

之觴廣納士民之壽八風循通卿雲叢聚盡天罄瑞率  
宇竭歡思散太極之泉以福無方之外可大赦天下

十一月帝在南豫州丙子赦本州殊死以下巡幸所經  
詳減今歲田租

十二月丙午行幸歷陽甲寅大赦天下南豫州別署勅  
繫長徒一切原散其兵期考襲謫戍悉停

臣欽若等曰  
考謂考課襲

謂襲

爵也

前廢帝以大明八年閏五月庚申即位大赦天下

永光元年正月乙未朔改元大赦天下

景和元年九月親討徐州刺史義陽王昶昶奔於魏十月癸亥曲赦徐州而還

十一月壬寅立皇后路氏四廂奏樂赦揚南徐二州丁未皇子生少府劉勝之子也大赦天下賊汙淫盜悉皆原除賜為父後者爵一級

明帝泰始元年十二月丙寅即皇帝位詔曰高祖武皇帝德洞四瀛化綿九服太祖文皇帝以大明定基世祖

孝武皇帝以下武寧亂日月所照梯山航海風雨所均

削衽襲帶所以業固盛漢聲溢隆周子業凶器自天忍

悖成性

子業即廢帝也

人面獸心見於髻日反道敗德著自比

年其狎侮五常怠棄三正矯誣上天毒流下國開闢所

未有書契所未聞再罹過宥而無一日之哀齊斬在躬

方深北里之樂虎兕難押馮河必彰遂誅滅上宰躬釁

逆之酷虐害國輔究孥戮之刑子鸞同生以昔憾放殄

敬猷兄弟以睚眦殲夷徵逼義陽將加屠膾陵辱戚藩

檣楚妃主奪立左右竊子置儲肆醜于朝宣淫于國事  
穢東陵行汙飛走積釁罔極日月滋深比遂圖犯玄宮  
志窺題湊將肆梟獍之禍騁商頓之心又欲鳩毒崇憲  
虐加諸父事均宮闈聲遍國都而鴟梟小豎莫不寵暱  
朝廷忠誠必也戮挫收掩之旨號虎結轍掠奪之使白  
刃相望百寮危氣首領無有全地萬姓推心妻子不復  
相保所以鬼哭山鳴星鈎血降神器殆於馭索景祚危  
於綴旒朕假寐凝憂泣血待旦慮太宗之基於焉而泯

武王之業將墜于淵賴七廟之靈藉八代之慶巨滑斯  
殄鴻沴將塞皇綱絕而復紐天緯缺而更張猥以寡薄  
屬承乾統上緝三光之重俯顧庶民之艱業業矜矜若  
履冰谷思與億兆同此維新可大赦天下改景和元年  
為泰始元年賜民爵二級鰥寡孤獨不能自存者穀人  
五斛逋租宿債勿復收犯鄉論清議賊汙淫盜竝悉洗  
除長徒之身特賜原遣亡官失爵禁錮舊勞一依舊典  
其昏制謬封竝皆刊削

二年正月吳郡太守顧琛吳興太守王曇生義興太守  
劉延熙晉陵太守袁標山陽太守程天祚並舉兵反二  
月曲赦吳郡吳興義興晉陵四郡晉陵平癸未曲赦浙  
江東五郡

三月癸丑曲赦揚南徐二州囚繫凡逋亡一無所問四  
月丁酉曲赦豫州

八月建安王休仁討江郢荆雍湘等五州平定之晉安  
王子勛等竝賜死同黨皆伏誅九月乙酉曲赦江郢荆

雍湘五州守宰不得離職癸丑六軍戒嚴大赦天下賜  
民爵一級

十月戊寅立王太子昱為皇太子曲赦揚徐二州

十二月乙丑詔曰近衆藩稱亂多染釁科或誠係本朝  
事緣逼迫混同證錮良以悵然夫天道尚仁德刑竝用  
雷霆時至雲雨必解朕眷言靜念思弘風澤凡應禁削  
皆從原蕩其文武堪能隨才銓用

三年正月癸卯曲赦豫州南豫二州二月丙申曲赦青



冀二州

八月癸卯詔曰法網之用期世而行寬惠之道因時而布况朕尚德戡亂依仁馭俗是宜每就弘簡以隆至治而頻罹兵革繇賦未休軍民巧偽興事甚多蹈刑入憲諒非一科至乃假名戎伍竊爵私庭因戰散亡託懼逃役且往者淪逼雖經累宥逋竄之黨猶為實繁宵言永懷良兼矜疚思所以重播至澤覃被區宇可大赦天下九月庚午曲赦徐兗青冀四州

四年正月己未親祠南郊大赦天下三月妖賊攻廣州  
龍驤將軍陳伯紹討平之五月乙丑曲赦廣州

五年五月躬耕籍田大赦天下賜力田爵一級

六年二月癸丑皇太子納妃甲寅大赦天下巧

注巧注  
調巧

偽注名軍中  
以免徭役也從軍不在赦例

七年四月辛丑詔減天下死罪一等凡勅繫悉遣之八  
月庚寅帝以疾愈大赦天下

後廢帝以秦豫元年四月己亥即位大赦天下

元徽元年正月戊寅朔改元大赦天下壬寅詔曰夫緩  
法昭恩裁風茂典蠲憲伏告訓俗彞義朕臨馭宸極  
宙制氓寓式存寬簡思字矜惠今開元肆宥萬品惟新  
凡茲遷斥宜均弘洗自元年以前貽罪徙放者悉聽還  
本鄉

二年五月江州刺史桂陽王休範舉兵反討平之丁酉  
詔京邑二縣埋藏所殺竝賊戰亡者復同京城是日解  
嚴犬赦天下文武賜位一等

十一月帝加元服大赦天下賜民男子爵一級為父後及三老孝悌力田者爵二級鰥寡孤獨篤癡不能自存者穀人五斛年八十以上加帛一疋大酺五日賜王公以下各有差

四年正月己亥躬耕籍田大赦天下賜力田爵一級貸貧民糧種七月南徐州刺史建平王景素據京師反乙未克京城斬景素其日解嚴丙申大赦天下封賞各有差原放京邑縣元年以前逋調

五年六月甲戌誅司徒左長史沈勃等大赦天下

臣欽  
若等

曰勃多實貨帝往劫而誅  
之事具閏位部暴虐門

順帝昇明元年七月壬辰即位改元大赦天下賜文武  
位二等十二月荊州刺史沈攸之等舉兵反司徒袁粲  
據石頭尚書令劉秉赴之甲戌大赦天下

二年二月沈攸之平曲赦荊州十一月壬寅立皇后謝  
氏減死罪一等五歲刑以下悉原

南齊太祖建元元年四月甲午受禪南郊禮畢大駕還

宮臨太極前殿詔曰五德更紹帝迹所以代昌三正迭  
隆王度所以改耀世有質文時或因革其資元膺歷經  
道振民固以異術同揆殊流共貫者矣朕以寡昧屬值  
艱季推肆勤之誠藉樂治之數賢能悉心士民致力用  
獲拯溺龕亂一匡天下業未參古功殆侔昔宋氏以陵  
夷有徵歷數攸及思弘樂推永鑒崇替爰集天祿于朕  
躬惟志菲薄辭弗獲命遂欽從天下式昭景命祇  
受正于文祖升禋亳于上帝猥以寡德光宅四海纂革

代之蹤託王公之上若涉淵水固知所濟寶祚初啓洪  
慶惟新恩俾利澤宣被億兆可大赦天下改宋昇明  
三年為建元元年賜民爵二級文武位二等鰥寡孤獨  
不能自存者人穀五斛逋租宿債勿復收有犯鄉論清  
議賊汙盜淫一皆蕩滌洗除先注與之更新長徒勅繫之  
囚特皆原遣亡官失爵禁錮舊勞一依舊典又詔曰宸  
運肇創實命惟新宜弘慶宥廣敷蠲貸劫賊餘口没在  
臺府者悉原放諸負繫流徙竝聽還本鄉

六月甲申立皇太子見刑入重者降一等竝申前赦恩  
百日七月詔曰交趾兆景獨隔書朔斯乃前運方季負  
海不朝因迷遂往歸欵莫繇曲赦交州部內李叔獻一  
人即撫南土文武詳才選用竝遣大使宣揚朝恩以試  
守武平太守行交州府事李叔獻為交州刺史

二年正月戊戌朔大赦天下六月癸未詔昔歲水旱曲  
赦丹陽二吳義興四郡遭水尤劇之縣元年以前三調  
未克虛歷已畢官長局吏應供償備外詳所除宥



三年六月壬子大赦時豫章王嶷發江陵有疾至京師  
未與帝憂慮為之大赦

四年二月帝不豫庚辰詔原京師囚繫有差

世祖武帝以建元四年三月壬戌即位大赦

六月甲申立皇太子長懋詔申癸酉赦恩百日

永明元年正月辛亥祠南郊大赦改元三月丙申詔曰  
朕自丁荼毒奄更周忌瞻言負荷若墜淵壑而遠圖尚  
蔽政刑未洽星緯失序陰陽愆度思播光澤兼酬天膏

可申辛亥赦恩五十日以期訖為始京師囚繫悉皆原宥三署徒優量降遣都邑鰥寡尤貧詳加賑卹戊寅詔四方見囚罪無輕重及劫賊餘口長徒勅繫悉皆原赦六月丙寅詔凡坐事應復治者在建元四年三月以前皆原

二年八月丙午詔申京師獄及三署見徒量所降宥三年正月辛卯祠南郊大赦都邑三百里內罪應入重者降一等餘依勅制勅繫之身降遣有差賑卹二縣貧

民

四年閏正月辛亥躬耕籍田詔曰思俾休和覃茲黔阜  
見刑罪殊死以下悉原宥

五年四月殷祀太廟詔繫囚見徒四歲刑以下悉原遣  
五年減為三歲京邑罪身應入量降一等

六年正月壬午詔二百里內獄同集京師克日聽覽自  
此以外委州郡訊察三署徒隸詳所原釋

七年正月辛亥祠南郊大赦京邑貧民普加恩賜

八年七月癸卯詔曰陰陽舛和緯象愆度儲宮嬰患海  
歷旬晷思仰祇天戒俯紓民瘼可大赦天下

九年正月辛丑祠南郊詔京師見繫囚詳量原遣

十一年正月癸丑詔京師見繫囚詳所原遣

鬱林王隆昌元年正月丁未改元大赦

海陵王延興元年七月丁酉即帝位詔曰太祖高皇帝  
英謨光大受命作齊世祖武皇帝宏略冠世繼暉下武  
世宗文皇帝清明懿鑠四海宅心竝德漏下泉功昭上

象聲教所覃無思不治洪基式固景祚方融而天步多  
阻運鍾否剝嗣君昏惑暴戾滋多侮棄天經悖滅人紀  
朝野重足遐邇側視民怨神恫宗祧如綴賴忠謨肅舉  
霄漢廓清俾三后之業絕而更紐七百之慶危而復安  
猥以冲人入纂乾緒載懷馭朽若墜諸淵思與黎元共  
綏戩福大赦改元文武賜位一等

明帝建武元年十月癸亥即帝位詔曰皇齊受終建極  
握鏡臨宸神武重輝欽明懿鑠七百攸長盤石斯固而

王度中愆天階薦阻嗣命多違藩釁孔棘宏圖景厯將  
墜諸淵宣德皇后遠鑒崇替憲章舊典疇咨台揆允定  
靈策用集寶命命予一人猥以虛薄續承大業仰繫鴻  
丕顧臨億兆永懷先構若履春冰寅憂夕惕罔識攸濟  
思與萬國播此惟新大赦天下改元宿衛者普轉一階  
其餘文武賜位二等逋租宿債換負官物在建武元年  
以前悉皆除放劫賊餘口在臺府者可悉原放負釁流  
徙竝還本鄉

二年正月辛未詔京師繫囚殊死可降為五歲刑三署見徒五歲以下悉原放十月納皇太子妃褚氏大赦

四年正月庚午大赦

永泰元年正月癸未朔大赦逋租宿債在四年之前皆悉原除四月甲寅改元赦三署囚繫原除各有差文武賜位二等

東昏侯永元元年正月改元大赦四月乙巳立皇太子大赦賜民為父後爵一級八月丙辰振州刺史始安王

遙光據東府反曲詔京邑九月壬戌以頻誅大臣大赦

天下

臣欽若等曰大臣謂僕射江祐侍中江祀也

二年四月平西將軍崔慧景於廣陵舉兵襲京師江夏王寶玄以京城納之豫州刺史蕭懿斬慧景詔曲赦京邑南徐兗二州

三年正月辛亥祀南郊大赦天下三月戊子曲赦江州

安城廬陵二郡

為蕭穎胄起兵廬陵

七月癸巳曲赦荆雍二州

和帝初封南康王為荊州刺史永元二年十一月南雍



州刺史蕭衍奉王舉義於江陵乃下教曰吾躬率晉陽  
翦此凶孽戎事方勤宜覃惠澤所領繫囚見徒罪無輕  
重殊死以下皆原遣先有位署即復本職將吏轉一級  
從征身有家口停鎮給廩食諸雜役見在諸軍帶甲之  
身克定之後悉免為民其功效賞報別有科條

三年正月乙巳王受宣德太后命為宣王相國大赦唯  
梅虫兒茹法珍等不在赦例

中興元年三月即帝位于江陵改元大赦

冊府元龜卷二百七

欽定四庫全書

冊府元龜卷二百八 宋 王欽若 等 撰

閔位部

恩宥二

梁高祖初平東昏為大司馬錄尚書事入屯閱武堂下  
詔曰皇家不造遭此昏凶禍延動植虐被人鬼社廟之  
危蠢焉如綴吾身籍皇宗曲荷先願受任邊疆推轂萬  
里眷言瞻烏痛心在目故率其尊主之情厲其忘生之

志雖寶歷重升明命有詔而獨夫醜縱方煽京邑投袂  
援戈克弭多難虐政橫流為日既久同惡相濟諒非一  
族仰稟朝命任在專征思播皇澤被之率土凡厥負釁  
咸與惟新可大赦天下唯王咥之等四十一人不在赦  
例又令曰夫樹以司牧非役物以養生視民如傷豈肆  
上以縱虐廢主棄常自絕宗廟窮凶極悖書契未有征  
賦不一苛酷滋章緹繡土木菽粟犬馬徵發閭左以充  
繕築流離寒暑繼以疫癘轉死溝渠曾莫收恤朽肉枯

駭烏鳶厭食加以天災人火屢焚宮掖官府臺寺尺椽  
無遺悲甚黍離痛兼麥秀遂使億兆離心疆徼寔弱斯  
民何辜離此塗炭今明昏遞運大道公行思治之氓來  
蘓茲日猥以寡薄屬當大寵雖運距中興難同草昧思  
闡皇休與之更始凡昏制謬賦淫刑濫役外可詳簡前  
源悉皆除蕩其主守散失諸所損耗精立科條咸從原  
例及為梁王又下令曰孤以虛昧任執國鈞雖宿夜勤  
止念在興治而育德振民邈然尚遠聖朝永言舊式隆

此眷命侯伯盛典方軌前烈嘉錫隆被禮數昭崇徒守  
愿節終隔體諒羣后百司重茲敦獎勉斯厚顏當此休  
祚望昆彭以長想欽桓文而歎息思弘政塗莫知津濟  
邦甸初啓藩宇惟新恩覃嘉慶被之下國國內殊死以  
下今月十五日昧爽以前一皆原放鰥寡孤獨不能自  
存者賜穀五斛府州所統亦同蠲蕩

天監元年四月丙寅即皇帝位于南郊禮畢備法駕即  
建康宮臨太極前殿詔曰五精遞襲皇王所以受命四

海樂推殷周所以改物雖禪代相舛造會異時而微明  
迭用其流遠矣莫不振民育德光被黎元朕以寡闇命  
不先後寧濟之功屬當期運乘此時來因心萬物遂振  
厥弛維天造區夏永言前蹤義均慙德齊氏以代終有  
徵歷數云改欽若前載集大命于朕躬顧惟菲德辭不  
獲命寅畏上靈用膺景業執禋柴之禮當與能之祚繼  
迹百王君臨四海若涉大川因知攸濟洪基初兆萬品  
權輿思俾慶澤覃被率土可大赦天下改齊中興二年

為天監元年賜民爵二級文武位二等鰥寡孤獨不能  
自存者人穀五斛逋布口錢宿債勿復收其有犯鄉論  
清議贓汙淫盜一皆蕩滌洗除前注與之更始又詔曰  
大運肇升加慶惟始劫賊餘口沒在臺府者悉可蠲放  
諸流徙之家並聽還本鄉

二年五月乙丑益州刺史鄧元起剋成都曲赦益州

三年六月癸未大赦天下

四年正月辛亥親祠南郊赦天下二月壬辰交州刺史



李凱據州反長史李叟討平之曲赦交州

五年十一月乙丑以師出淹時大赦天下

六年八月戊子赦天下

七年四月乙卯皇太子納妃赦大辟以下頒賜朝臣及  
近侍各有差八月丁巳赦大辟以下未結正者

八年正月辛巳親祠南郊赦天下内外文武各賜勞一  
年

十年正月辛丑親祠南郊大赦天下居局治事賜勞二年

十一年三月丁巳曲赦揚州徐州

十二年正月辛卯親祠南郊赦大辟以下

十三年二月丁亥親畊籍田赦天下孝弟力田賜爵一

級

十四年正月乙巳朔皇太子寇赦天下賜為父後者爵

一級

十五年九月壬辰赦天下十一月丁卯交州刺史李叟

斬交州反者阮宗孝傳首京師曲赦交州

十七年二月甲辰大赦天下

十八年四月丁巳大赦天下

普通元年正月乙亥朔改元大赦天下賜文武勞位孝弟力田爵一級尤貧之家勿收常調鰥寡孤獨並加賑

卹

二年正月辛巳親祠南郊戊子大赦天下

三年三月壬辰朔日有食之既癸巳赦天下四方民所疾苦咸即以聞

四年正月辛卯親祠南郊大赦天下應諸窮病咸加賑

卹

六年正月辛亥親祠南郊大赦天下三月丙午歲星見南斗賜親附民長復除註誤罪失一無所問七月壬戌大赦天下

七年正月辛丑朔赦殊死以下十一月庚辰大赦天下  
大通元年正月辛未親祠南郊詔曰欽奉時事虔薦蒼  
璧思承天德惠此下民凡因事去土流移他境者竝聽

復宅業蠲後五年尤貧之家勿收三調孝弟力田賜爵  
一級三月己未幸同泰寺甲戌還宮赦天下改元

中大通元年正月辛酉親祠南郊大赦天下孝弟力田  
賜爵二級六月壬午大赦天下九月癸己幸大同寺設  
四部無遮大會十月己酉還宮大赦改元

三年正月辛巳親祠南郊大赦天下孝弟力田賜爵一  
級七月乙亥立晉安王綱為皇太子大赦天下賜為父  
後者及出處忠孝文武清勤並賜爵一級

五年正月辛卯親祠南郊赦天下孝弟力田賜爵一級  
六年二月癸亥親耕籍田大赦天下孝弟力田賜爵一

級

大同元年正月戊申朔改元大赦

三年正月辛丑親祠南郊大赦天下孝弟力田賜爵一  
級八月辛卯幸阿育王寺赦天下

四年七月癸亥詔以東治徒李喬之家降如來形舍利  
大赦八月甲辰詔南兗北徐西徐東徐青冀南北青武仁潼

睢等十三州既經饑饉曲赦逋租宿債勿收今年二調  
六年正月庚戌朔曲赦司豫徐兗四州八月戊午赦天  
下十一月己卯曲赦京邑

七年正月辛巳親祠南郊赦天下其有流移及失桑梓  
者各還田宅蠲課五年十一月丁丑詔曰民之多幸國  
之不幸恩澤屢加彌長姦盜朕亦知此之為病矣如不  
優赦非仁人之心凡厥僞言讐言逋負起今七年十一月九  
日昧爽以前在民間無問多少言上尚書督所未入者

皆赦除之

十年九月己丑詔曰今茲遠近雨澤調適其穫已及冀必萬箱宜使百姓因斯安樂凡天下罪無輕重已發覺未發覺討捕未禽者皆赦宥之侵割耗散官物無問多少亦悉原除田者荒廢水旱不作無當時交例應追稅者并作田不登公格者並停各備臺州以文最逋殿罪悉從原

中大同元年三月乙巳大赦天下凡主守割盜放散官



物及以軍糧器甲凡是赦所不原者起大同十一年正月以前皆悉從恩十一年正月以後悉原加責其或為事逃叛流移因饑亡鄉失土可聽復業蠲課五年停其徭役其被拘之身各還本部舊業若在皆悉還之四月丙戌於同泰寺講解設會大赦改元孝弟力田為父後者賜爵一級

太清元年正月辛酉親祠南郊詔曰天行彌綸覆幬之功溥乾道變化資始之德成朕沐浴齋宮虔恭上帝祇

承禎燎高燥太一典禮克遂感慶蕪懷思與億兆同其  
福惠可大赦天下尤窮者無出即年租調清議禁錮並  
皆宥釋所討逋叛巧籍隱年閹丁匿口開恩百日各令  
自首不問往罪流移他鄉聽復宅業蠲課五年孝弟力  
田賜爵一級居局治事賞勞二年三月庚子幸同泰寺  
設無遮大會四月丁亥還宮大赦天下改元孝弟力田  
為父後者賜爵一級

二年五月辛亥曲赦交愛德三州八月甲辰邵陵王綸

督衆軍討侯景曲赦南豫州

簡文帝大寶元年正月辛亥朔詔曰蓋天下者至公之神器在昔三五不獲已而臨蒞之故帝王之功聖人之餘事軒冕之華儻來之一物太祖文皇帝含光大之量啓西伯之基高祖武皇帝道洽二儀知周萬物屬齊季薦瘥彞倫剝喪同氣離不測之禍元首懷無厭之欲乃啓樂推之運因億兆之心拯彼摧角雪茲讐言耻大慈之業普薰汾陽之詔屢下于茲四紀無得而稱朕以寡昧哀棗

孔棘生靈已盡志不圖全黽勉視陰企承鴻緒王道未  
直天步猶艱式憑宰輔以弘庶政履端建號仰維舊章  
可大赦天下改太清四年為大寶元年

孝元帝初為湘東王大寶三年在江陵猶稱太清六年  
五月令曰君子赦過著在周禮聖人解網聞之湯令自  
獫狁孔熾長蛇薦食赤縣沾危黔黎塗炭終宵不寐志  
在雪耻元惡稽誅本屬侯景王偉是其心膂周石珍棄  
背恩義今並烹諸鼎鑊肆之市朝但此寇擾為歲已積

衣冠舊貴被逼偷生猛士勲豪和光苟免凡諸惡侶諒  
非一族今特闡以王澤削其刑書自太清六年五月二  
十日昧爽以前咸使維新

承聖元年十一月丙午即皇帝位於江陵詔曰夫樹之  
以君司牧黔首帝堯之心豈貴黃屋誠弗獲已而臨蒞  
之朕皇祖太祖文皇帝積德岐梁化行江漢道映在田  
具瞻斯屬皇考高祖武皇帝明並日月功格區宇應天  
從人惟睿作聖太宗簡文皇帝地侔啓誦方符文景羯

寇憑凌時難孔棘朕大拯橫流尅復宗社羣公卿士百  
辟庶僚咸以皇靈睽命歸運斯及天命不可以久淹宸  
極不可以久曠粵若前載憲章令範畏天之威纂隆寶  
歷用集神器于予一人昔虞夏商周年無嘉號漢魏晉  
宋因循已久朕雖云撥亂自非創業思得上繫宗祧下  
惠億兆可改太清六年為承聖元年逋租宿債並許弘  
貸孝子從孫可悉賜爵

臣欽若等曰梁武帝父名順之故曰從孫

長徒鑠士

特加原有禁錮奪勞一皆曠蕩

敬帝紹泰元年九月丙午即帝位十月己巳詔曰王室  
不造嬰罹禍釁西都失守朝廷淪覆先帝梓宮播越非  
所王基傾弛率土罔戴朕以荒幼仍屬艱難泣血枕戈  
志復讎逆大耻未雪夙宵鯁憤羣公卿尹勉以大義越  
登寡闇嗣奉洪業顧惟夙心念不至此庶仰憑先靈傍  
資將相尅清元惡謝寃陵寢令墜命載新宗祊更祀慶  
流億兆豈予一人可改承聖四年為紹泰元年大赦天  
下内外文武賜位一等

太平元年正月戊寅以南豫州刺史任約譙秦二州刺史徐嗣徽舉兵反討平之大赦天下其與任約徐嗣徽叶契同謀一無所問癸未震州刺史杜龕降詔賜死曲赦吳興郡二月丙辰以東揚州刺史張彪叛斬首傳京師曲赦東揚州六月乙卯司空陳霸先大破齊軍大赦天下軍士身殞戰場悉遣欽祭其無家屬即為瘞埋二年四月癸酉以廣州刺史蕭勃反平之曲赦江廣衡三州并督內為賊所拘逼者並皆不問



陳高祖永定元年十月受梁禪即皇帝位於南郊柴燔  
禮畢還宮臨太極前殿詔曰五德更運帝王所以御天  
三正相因夏殷所以宰世雖色分駢翰時異文質揖讓  
征伐迄用參差而育德振民義歸一揆朕以寡昧時屬  
艱危國步屢屯天維三絕肆勤先后拯厥橫流藉將帥  
之功兼猛士之力一正天下再造黔黎梁氏以天祿永  
終歷數攸在遵與能之典集大命於菲德辭不獲亮式  
從天睠俯協民心受終文祖升禋上帝繼統百王君臨

萬宇若涉淵水固知攸濟寶業初建皇祚維新恩俾惠澤覃被億兆可大赦天下改梁太平二年為永定元年賜民爵一級文武二等鰥寡孤獨不能自存者人穀五斛逋租宿債皆勿復收其有犯鄉里清議賍污淫盜者皆洗除先注與之更始長徒勅繫特皆原之亡官失爵禁錮奪勞一依舊典

二年正月辛丑親祠南郊詔曰朕受命君臨初移星琯孟陬嘉月備禮泰壇景候韶華人祇允慶思令億兆咸

與維新且往代祆氛於今猶梗軍機未息征賦咸繁事

不獲已久知下弊言念黔黎無忘寢食夫罪無輕重已

發覺未發覺在今昧爽以前皆赦除之西寇自王琳以

下並許還送一無所問也

臣欽若等曰琳本梁之臣陳高祖既立敬帝琳奉永嘉王

莊慕梁祚於湘中莊以琳為丞相錄尚書事故云西寇

近所募義軍本擬西寇並

宜解遣留家附業輓訂軍資未送者並停元年軍糧逋

餘者原其半州郡縣軍戍並不得輒遣使民間務存優

養若有侵擾嚴為法制

世祖文帝以永定三年六月丙午即位於太極前殿詔曰上天降禍奄集邦家大行皇帝背離萬國率土擁心若喪考妣龍圖寶曆眇屬朕躬運鐘擾攘事功機務南面須主西讓禮輕今便式膺景命光宅四海可大赦天下罪無輕重悉皆蕩滌逋租宿債吏民憊負可勿復收文武內外量加爵叙孝弟力田為父後者賜爵一級庶祇畏在心公卿畢力勝殘去殺無待百年興言號哽深增慟絕

天嘉元年正月癸丑詔曰朕以寡昧嗣纂洪業哀憚在  
疚治道弗昭仰惟前德幽顯遐暢恭已不言庶幾無改  
雖宏圖懋軌日月方弘而清廟廓然聖靈浸遠敢尋永  
往瞻言罔極今四象運周三元造獻華夷胥洎玉帛駮  
奔思覃遺澤播之億兆其大赦天下改永定四年為天  
嘉元年鰥寡孤獨不能自存者賜穀人五斛孝弟力田  
殊行異等加爵一級三月戊戌詔曰夫五運遞來三靈  
眷命皇王因之改創殷周所以樂推朕統歷承基丕隆

鼎運期理攸屬數祚斯在豈僥倖所至寧卜祝可求故  
神器之重必在符命是以逐鹿貽譏斷蛇定業亂臣賊  
子異世同尤王琳識暗挈瓶智慙衛足千紀亂常自貽  
顛沛而縉紳君子多被繫維雖涇渭合流蘭鮑同肆求  
之厥理或有脇從今九罭既設八紘斯掩天網恢恢吞  
舟是漏至如伏波遊說永作漢藩延壽脫歸終於魏守  
器改秦虞材通晉楚行藏用捨亦豈有常宜加寬仁以  
彰奮作其衣冠士族預在凶黨悉皆原宥將帥戰兵亦同

肆青並隨才銓引庶收力用六月辛丑以國哀周忌臨於太極前殿百僚陪哭赦京師殊死以下

二年正月庚戌大赦天下三月庚寅以湘州城主殷亮降曲赦湘州諸郡

三年閏三月甲申大赦天下四月癸卯曲赦東陽郡四年九月癸亥曲赦京師十二月丙申大赦天下

五年七月丁丑詔曰朕以寡昧屬當負重星籥亟改冕旒弗曠不能仰叶璿衡用調玉燭傍慰蒼生以安黔首

兵無寧歲民乏有年移風之道未弘習俗之患猶在致  
令民多觸網吏繁筆削獄犴滋彰雖繇物犯罔圖淹滯  
亦或有寃念俾納隍載勞負戾加以膚腠不適攝衛有  
虧比獲微痊思覃寬惠可曲赦京師十二月甲子曲赦  
建安晉安二郡

六年十二月癸亥詔曰朕自居民牧之重託在王公之  
上顧其寡昧鬱于治道加以屢虧聽覽事多壅積寃滯  
靡申幽枉弗鑒念茲罪隸有甚納隍而惠澤未流愆陽



累月今歲序云暮元正向肇欲使幽圉之內同被時和  
曲赦京師

天康元年二月丙子詔曰朕以寡德纂承洪緒日昃劬  
勞思弘景業而政道多昧黎庶未康兼疾患淹時亢陽  
累月百姓何咎是繇朕躬念茲在茲痛如疾首可大赦  
天下改天嘉七年為天康元年

廢帝以天康元年四月癸酉即位於太極前殿詔曰上  
天降禍大行皇帝奄棄萬國拔號靡及五內崩殞朕以

寡德嗣膺寶命兢兢在疚懼甚綴旒方賴宰輔救其不  
逮可大赦天下詔内外文武各復其職遠方悉停奔赴  
光大元年正月乙亥詔曰昔昊天成命降集寶圖二君  
重光九區咸乂閔余冲渺王道未昭荷茲神器如涉靈  
海庶親賢竝建牧伯惟良天下雍熙緬同刑措今三元  
改歷萬國充庭清廟無追具僚斯在言瞻宁位觸感摧  
心思播遺恩俾覃黎獻可大赦天下改天康二年為光  
大元年孝弟力田賜爵一級十月辛巳赦湘巴二郡為

華皎所註誤者

臣欽若等曰皎為相州刺史送子玄饗質於後梁請兵伐陳為陳所敗乃奔于

梁

宣帝太建元年正月甲午即位詔曰夫聖人受命王者  
中興並繇懿德方作元后高祖武皇帝揖拜堯圖經綸  
禹跡配天之業光辰象而利貞格地之功侔川岳而長  
遠世祖文皇帝體上聖之姿當下武之運築宮示儉所  
務唯德定鼎初基厥謀斯在朕以寡薄才非聖賢夙荷  
前規方傳景祚雖復親承訓誨志守藩維詠季子之高

風思陽城之遠託自元儲紹國正位君臨無導非幾佇  
聞刑措豈圖王室不造頻搆亂階天步艱難將傾寶厯  
仰惟嘉命爰集朕躬我心貞確空誓蒼昊而羣辟啟請  
相誼渭橋文母尊嚴懸心長樂對揚璽紱非止殷湯之  
三辭履涉春冰何但代王之五讓今便肅奉天策欽承  
介圭若據滄溟愈增競業思所以雲行雨施品物咸亨  
當與黔黎普同斯慶可改光大三年為太建元年大赦  
天下在位文武賜位一階孝弟力田及為父後者賜爵

一級異等殊才並加策序鰥寡孤獨不能自存者仍賜穀五斛

二年三月丙午以新除左衛將軍歐陽紇據廣州反儀同章昭達討平之曲赦廣衛二州丁未大赦天下

三年三月丁丑大赦天下自天康元年訖太建元年逋餘軍糧祿秩有調未入者悉原之又詔犯逆子弟及屬逃亡異境者悉聽歸有繫繫者諒可散釋其有居宅並追還

四年九月庚子朔日有食之辛亥大赦天下

六年正月壬戌朔詔曰王者以四海為家萬姓為子一物乖方夕惕猶厲六合未混旰食彌憂朕嗣纂鴻基思弘經畧上符景宿下叶人謀命將興師大拯淪溺灰琯未周凱捷相繼拓地數千連城將百蠢彼餘黎毒茲異境江淮年少猶有剽掠鄉閭無賴擿出陰私將帥軍人罔顧刑典今使苛法蠲除仁聲載路且肇元告慶邊服來荒始覩皇風宜覃曲澤可赦江右淮北南司定霍光建

朔合豫北徐仁北充青冀南譙南兗十三州郢洲之齊  
安西陽江洲之齊昌新蔡高唐南豫州之歷陽臨江郡士  
民罪無輕重悉皆原宥將帥職司軍人犯法自依當科  
十年三月乙酉大赦天下

十一年十一月辛卯詔曰盡寇弗犯草此澆風孳戮是  
蹈化于薄俗朕肅膺寶命迄將一紀思經邦濟治憂國  
愛民日昃劬勞夜分輟寢而還淳返樸其道靡階雍熙  
盛美莫云能致遂乃鞠訊之牒盈于聽覽春鈇之人煩

于牢犴周成刑措漢文斷獄杼軸空勞邈然既遠加以  
蕞爾醜徒軼我彭汴淮汝氓庶企踵王畧治兵誓旅義  
存拯救飛芻輓粟征賦頗煩暑雨祁寒寧忘咨怨兼宿  
度乖舛次舍違方若日之誠責歸元首愧心斯積馭朽  
非懼即建子令月微陽初動應此嘉辰宜播嘉澤可大  
赦天下

後主以太建十四年正月丁巳即帝位于太極前殿詔  
曰上天降禍大行皇帝奄棄萬國攀號擗踊無所逮已



朕以哀梵調膺寶歷若涉巨川罔知攸濟方賴羣公用  
裨寡薄思播遺德覃被億兆凡厥遐邇咸與維新可大  
赦天下在位文武及孝弟力田為父後者並賜爵一級  
孤老鰥寡不能自存者賜穀人五斛帛二疋七月辛未  
大赦天下

九月丙午設無遮大會於太極殿捨身及乘輿御服大  
赦天下

至德元年正月壬寅詔曰朕以寡薄嗣守鴻基哀惻切

慮疹恙纏織訓俗少方臨下靡筭懼甚踐冰慄同馭朽  
而四氣易流三九遄至紱纓引陞玉帛充庭具物匪新  
節序疑舊緬思前德永慕昔辰對軒闥而哽心顧宸筵  
而咽氣思所以仰遵遺構俯勵薄躬陶鑄九流休息百  
姓用弘寬簡取叶陽和可大赦天下改大建十五年為  
至德元年

二年正月癸巳大赦天下十一月丙寅大赦天下

三年十一月辛巳幸長干寺大赦天下

四年十一月己卯詔曰惟刑止暴惟德成物三才是資  
百王不改而世無抵角時鮮犯鱗渭橋驚馬弗聞廷爭  
桃林逸牛未見其旨雖剽悍輕侮理從鉗鋏蠢愚挂點  
宜肆含弘政乏良哉明慙則哲求諸解網安可得乎是  
用屬寤寐以軫懷負黼屨而於邑復茲合璧輪缺連珠  
運舛黃鍾獻呂和氣始萌玄英告中履長在御因時宥  
過抑乃斯得可大赦天下

禎明元年正月戊寅詔曰栢皇大庭鼓淳和于曩日姬

王羸后被澆風於末載刑書已鑄善化匪融禮義既生  
姦宄斯作何其淳樸不反浮華競扇者與朕居中御物  
納隍在睠頻恢天網屢絕三邊元元黔庶終罹五辟蓋  
乃康哉寡薄抑亦法令滋彰是用當宁弗怡矜此向隅  
之意今三元具序萬國朝晨靈芝獻於始陽膏露凝於聿  
歲從春施令仰乾布德思與九有惟新七政可大赦天  
下改至德五年為禎明元年九月甲午以江陵蕭琛所  
置安平王蕭巖降大赦天下

梁末帝禎明六年四月己亥詔曰應天下見禁罪人犯  
大辟合抵極刑者宜示好生特令減死除准格律常赦  
不原外徒流以下遞減一等左降官未經量移者與量  
移已量移者更與復資

冊府元龜卷二百八

欽定四庫全書

冊府元龜卷二百九

宋 王欽若等 撰

閏位部

欽恤 念功 寬恕 宥過 悔過

欽恤

明慎之文見之於義易欽恤之戒著之於虞書故君子之所以盡心者蓋刑之謂矣昔劉氏閏位宅彼江介惟梁暨陳維守其國乃有勵精政治軫念黎庶下寬大之

詔開疏闊之網革去苛法逮用中典雖未臻夫至化亦  
可見其休德者焉

宋高祖永初二年六月壬寅詔曰杖罰雖有舊科然職  
務殷碎推坐相尋若皆有其實則體所不堪文行而已  
又非設罰之意可籌量粗為中否之格

十月丁酉詔曰兵刑峻重務在得宜後身死叛輒考傍  
親流遷彌廣未見其極遂令冠帶之倫淪陷非所宜草  
以弘泰去其密科自今犯罪充軍合舉戶從役者便付



營押領其科戶絕及謫止一身者一不得復侵濫服親以相連染

少帝即位初詔曰平理獄訟政道所先朕哀荒在疚未堪親覽司空尚書令可率衆官月二決獄

孝武帝大明三年八月甲子詔曰昔姬道方凝刑罰斯厝漢德初明犴圜用簡良繇上一其道下淳其性今民澆俗薄誠淺偽深重以寡德弗能心化故知方者尠趣辟寔繁向因巡覽見二尚方徒隸纓金屨較既有矜復

加以國慶民和獨隔凱澤益以慙焉可詳所原宥

九月己巳詔曰夫五辟三刺自古所難巧法深文在季  
彌甚故公情察訟魯師致捷市獄勿擾漢史飛聲廷尉  
遠邇疑讞平決攸歸而一蹈幽圜動逾時歲民嬰其困  
吏容其私自今囚至辭具並即以聞朕當悉詳斷庶無  
留獄若繁文滯劾證逮遐廣必須親察以盡情狀自後  
依舊聽訟

五年十一月詔曰王畿內奉京師外表衆夏民殷務廣

宜思簡惠可遣尚書就加詳簡並與縣宰平治庶獄其  
有疑滯具以狀聞

南齊武帝永明二年四月詔揚南兖二州統內諸獄荆  
豫江三州府見囚江州潯陽新蔡兩郡繫獄並部送還  
臺須俟克日斷枉直緣江遠郡及諸州委刺史詳察訊  
鞫

明帝建武二年四月己亥朔詔三百里內獄訟同集京  
師克日聽覽此外委州訊察三署徒隸原遣有差

梁高祖天監二年正月甲寅朔詔曰三訊五聽著自聖  
典哀矜折獄義重前誥蓋所以明慎用刑深戒疑枉成  
功致治罔不繇茲自昔藩部嘗躬訊錄求理得情洪細  
必盡末運弛網斯政又闕牢犴沉壅申析靡從朕屬當  
期運君臨億兆雖復齋居宣室留心聽斷而九牧遐荒  
無因臨覽深懼懷寃就鞠匪唯一方可申勅諸司月一  
臨訊博詢擇善務在確實

五年四月甲寅詔曰朕昧旦齋居惟刑之恤三辟五聽

寢興載懷故陳肺石於都街增官司於詔獄殷勤親覽  
小大以情而明慎未洽囹圄尚壅永言納隍在于興愧  
凡犴獄之所可遣法官近侍遞錄囚徒如有枉滯以時  
奏聞

十六年正月詔班下四方諸州郡縣時理獄訟勿使冤  
滯並若親覽

陳文帝天嘉元年十二月詔曰古者春夏二氣不決重  
罪蓋以陽和布澤天秩是弘寬網省刑義符含育前王

所以則天象地懸法垂訓者也朕屬當澆季思求民瘼  
哀矜惻隱念甚納隍欲遵舊軌用長風化自今孟春訖  
于夏首罪人伏辟事已疑者宜且申停

後主禎明二年十一月丁卯詔曰夫議獄緩刑皇王之  
所垂範勝殘去殺仁人之所同心自畫冠既息刺史斯  
起法令滋彰手足無措朕君臨區宇屬當澆末輕重之  
典在政未康小大之情興言多媿眷茲狴犴有軫哀矜  
可克日於大政殿訊獄

念功

非賢固治實著於昌言惟帝念功式敷於光宅君臣之  
際今古共然自皇階未夷世道多梗合離之期有數雄  
俊之才遂興雖識緯之符未參於命厯然經綸之業咸  
闡於茂勲觀其感召風雲招延心膂爪牙之用苟有補  
於當時帶礪之盟乃仰同於前典至於顧待終始感慨  
存亡必舊人而是圖雖小忿而無廢豈唯忠諒之節類  
王臣而匪躬抑亦沮勸之方俾懦夫而增氣

蜀向朗字巨達領丞相諸葛亮長史後免官歸成都數年為光祿勳亮卒後徙左將軍後主追論舊功封顯明亭侯位特進

吳周瑜字公瑾兄子峻亦以瑜元功為偏將軍領吏士千人峻卒全琮表峻子護為將大帝曰昔走曹操拓有荊州皆是公瑾常不忘之初聞峻亡仍欲用護聞護性行危險用之適為作禍故便止之孤念公瑾豈有已乎周喬瑜之子封都鄉侯後以罪徙廬陵郡赤烏二年諸



葛瑾步騭連名上疏曰故將軍周瑜子喬昔蒙粉飾受封為將不能養之以福思立功效以至縱情欲招速罪辟臣竊以瑜昔見寵任入作心膂出為爪牙御命出征身當矢石盡節用命視死如歸故能摧曹操於烏林走曹仁於郢都揚國威德華夏是震蠢爾蠻荆莫不賓服雖周之方叔漢之信布誠無以尚也夫折衝扞難之臣自古帝王莫不貴重故漢高帝封爵之誓曰使黃河如帶太山如礪國以永存爰及苗裔申以丹書重以盟詛

藏于宗廟傳於無窮欲使功臣之後世世相踵非徒子孫乃閔苗裔報德明功勤懇懇如此之念欲勸戒後人用命之臣死而無悔也況於瑜身沒而未久而其子降為匹夫益可悼傷竊惟陛下欽明稽古隆於興繼為裔歸訴乞勾餘罪還兵復爵使失旦之鷄復得一鳴抱罪之臣展其後效大帝答曰腹心舊勳與孤協事公瑾有之誠所不忘昔裔年少初無功勞橫受精兵爵以侯將蓋念公瑾以及於裔也而裔恃此醜淫自恣前後告

諭曾無悛改孤於公瑾義猶二君樂裔成就豈有已哉  
迎裔非惡未宜便還且欲苦之使自知之今二君勤勤  
援引漢高河山之誓孤用恧然雖德非其儔猶欲庶幾  
事亦如爾故未順旨以公瑾之子而二君在中間苟使  
得改亦何患乎瑾騰表比上朱然及全琮亦俱陳乞大  
帝乃許之

潘璋為右將軍性奢泰數不奉法監司舉奏大帝惜其  
功而輒原不問嘉禾三年卒子平以無行徙會稽璋妻

居建業賜田宅復客五十家

顧譚代祖父雍平尚書事後有司奏譚誣罔大不敬罪應大辟大帝以雍故不致法皆徙之

宋檀韶初以佐命功為江州刺史嗜酒貪橫所蒞無績高祖嘉其合門從義弟道濟又有大功既免官故特見寵授加邑至千五百戶

傅亮少帝景平二年率行臺至江陵奉迎文帝後帝將誅亮至廣莫門帝遣中書舍人以詔書示亮並謂曰以

公江陵之誠當使諸子無恙

謝靈運為臨川內史在郡遊放司徒遣使隨州錄事鄭望生收之靈運執望生與兵叛逸廷尉論正斬刑文帝愛其才欲免官而已彭城王義康堅執謂不宜恕乃詔曰靈運罪釁累仍誠合盡法但謝立勲參微管宜宥及後嗣可降死一等徙付廣州

張茂度為益州刺史時文帝討荊州刺史謝晦詔益州遣軍襲江陵晦已平而軍始至白帝茂度與晦素善議

者疑其出軍遲留時茂度弟劭為湘州刺史起兵應大  
駕帝以邵誠節故不加罪被代還京師累遷太常以脚  
疾出為義興太守從容謂曰勿以西蜀介懷對曰臣不  
遭陛下之明墓木拱矣

劉康祖襲父虔之封轉貞外散騎常侍以浮蕩蒲酒為  
事前後屢被劾文帝以勲臣子每原貸之

王華為護軍侍中卒年四十三追贈散騎常侍衛將軍  
元嘉九年文帝思誅徐羨之功追封新建縣侯食邑千

戶謚曰宜侯

王曇首為侍中元嘉七年卒九年文帝以豫誅徐羨之等謀追封豫寧縣侯邑千戶謚曰文侯

南齊王敬則為南兗州刺史進號安北將軍魏人侵淮泗敬則恐委鎮還都百姓皆驚散奔走太祖以其功臣不問以為都官尚書撫軍又進號征東將軍宋廣州刺史王翌之子妾路氏酷暴殺婢翌之子法郎告敬則敬則付山陰獄殺之路氏家証為有司所奏山陰令劉岱

坐棄市刑敬則入朝太祖謂敬則曰人命至重是誰下  
意殺之何不啓聞敬則曰是臣愚意臣知何物科法見  
背後有節便言應得殺人劉岱亦引罪太祖乃赦之敬  
則免官以公領郡

梁曹景宗為平西將軍郢州刺史魏軍攻司州圍刺史  
蔡道恭城中負版而汲景宗望門不出但揮軍遊獵而  
已及司州城陷為御史中丞任昉所奏高祖以功寢而  
不治徵為護軍將軍既至復拜散騎常侍右衛將軍



北齊薛循義高祖時為齊州刺史以黷貨除名追其前  
守晉州功復其官爵

慕容紹宗為開府累有戰功卒贈太尉尚書令後其長  
子士肅為散騎常侍尋以謀反伏誅文襄以紹宗之故  
罪止肅身

高慎為豫州刺史遂據武牢降西魏慎先入關周文帝  
率衆東出高祖破之於邙山慎妻子將西度於路盡擒  
之高祖以其勲家啟慎一房配沒而已

庫狄干從神武起兵破四胡於韓陵封廣平縣公尋進  
郡公河陰之後諸將大捷唯干兵退神武以其舊功竟  
不責黜尋轉太子太傅

晉華溫琪仕梁為晉州節度使溫琪在任違法籍民家  
財入己其家訟于朝制使劾之伏罪末帝以先朝草昧  
之臣不忍加法左拾遺李愚堅案其罪帝詔曰朕若不  
與鞠究謂予不念赤子若遂行與憲謂予不念功臣為  
子君者不亦難乎其華溫琪所受贓宜官給代還所訟

之家

寬恕

史臣稱漢祖寬明而仁恕又聖人之言曰寬則得衆是知有國之君受天之命何嘗不收覽羣心開創王業而况閏位之主書軌不同勅敵互相爭伐豪傑得以願望儻非體巨浸之納污同山藪之藏疾則何以立彼宗祏傳之子孫故有奔亡隣國待妻子以如初交關外域宥昆弟而勿坐至於念世祿重時名慰羈孤之心安反側

之意屈彼彞憲從於輕典或不奪其爵土或復實於官  
裳本乎原情繇之得衆雖刑故無小或失為邦之訓而  
御下以寬亦見君人之度矣

蜀先主時黃權為鎮北將軍督江北軍以防魏師先主  
自江南及吳將軍陸議乘流斷圍南軍敗績先主引退  
而道隔絕權不得還故率將所領降魏有司執法白收  
權妻子先主曰孤負黃權權不負孤待之如初

吳大帝嘉禾六年丞相顧雍奏在官奔喪自從大辟其

後吳令孟宗喪母奔赴已而自拘於武昌以聽刑陸遜  
陳其素行因為之請帝乃減宗一等後不得以為比因  
此遂絕

宋少帝時王玄謨為謝晦荊州南蠻行參軍武昌太守  
晦敗以非大帥見原

徐湛之為丹陽尹范煜等謀逆湛之始與之同後發其  
事所陳多不盡為煜等款辭所連乃詣廷尉歸罪帝慰  
遣令還郡湛之上表曰賊臣范煜孔熙先等連結謀逆

法靜尼宣分往還與大將軍臣義康共相唇齒備於  
鞠對伏尋仲承祖始達熙先等意便極言姦狀而臣兒  
女近情不識大體上聞之初不務指斥紙翰所載尤復  
漫略者實以凶計既表逆事歸露又仰緣聖慈不欲窮  
盡故言勢依違未敢縷陳情旨無隱已昭天監及羣凶  
收擒各有所列煜等口辭多見誣謗承祖醜言紛紜特  
甚乃云臣與義康宿有密契在省之言期以為定潛通  
奸意報示天文末云熙先懸指必同以誑於煜或以智

勇見稱或以愚懦為目既美其信懷可覆復駭其動止必  
啟凡諸詭妄還自違伐多舉事端不究原統齎傳之信  
無有主名所徵之人又已死沒首尾乖舛自為矛盾即  
臣誘引之辭以為始謀之證銜臣糾告並見怨咎縱肆  
狂言必見禍陷伏自探省亦復有跡昔義康南出之始  
勅臣入相伴慰晨夕覲對經踰旬日逆圖成謀雖無顯  
然懟容異意頗形言旨遺臣利及期以際會臣苦相諫  
譬深加距塞以為怨憤所至不足為慮便以開啓懼成

虛妄思量反覆實經愚心非為納受曲相蔽匿又令申  
情范煜釋中間之憾致懷蕭思話恨婚意未申謂此僥  
倖亦不宜達陛下敦惜天倫彰於四海藩禁優簡親理  
咸通又昔蒙眷顧不容自絕音翰信命時相往來或言  
少意多旨深文淺辭色之間往往難測臣每懼異聞皆  
略而不答惟心無邪悖故不稍以自嫌縷縷丹誠實具  
如此啟至於法靜所傳及熙先等謀知實不早見闕之  
日便即以聞雖晨光幽燭曲昭窮款裁以正義無所逃



刑東轍北闕請罪司寇乾施舍宥未加治考中旨頻降  
制使還往仰荷恩私哀惶失守臣殃積罪深丁罹酷罰  
久應屏棄永謝人理况姦謀所染忠孝頓闕智防愚淺  
闇於禍萌士類未明其心羣庶謂之同惡朝野側目衆  
議沸騰專信讐隙之辭不復稍相申體臣雖駕下情非  
木石豈不知醜點難嬰伏劍為易而覲然視息忍此餘  
生實非苟希微命假延漏刻誠以負戾灰滅貽惡方來  
貪及視息少自披訴冀幽誠丹款儻或昭然雖復身膏

草木九泉無恨顯居官次垢穢朝班厚顏何地可以自處乞蒙矜放伏待鈇鑕優詔不許

孔靈符為會稽太守加豫章王撫軍長史靈符家本豐富產業甚廣又於永興立墅周迴三十三里水陸地二百六十五頃合帶二山又有果園九處為有司所糾詔原之

王僧達為太子舍人坐屬疾而於楊烈橋觀鬪鴨為有司所糾原不問

謝靈運為侍中自以名輩應參時政被徵召便以此自許既至太祖唯接以文義而王曇首等名位素不之踰並見任遇靈運意不平多稱疾不朝直出郭遊行經旬不歸既無表聞又不請急帝不欲傷大臣諷旨令自解靈運乃上表陳疾賜假東歸

孝武帝時孔覲為御史中丞鞭令史為有司所糾原不問

南齊太祖時卞彬初仕宋為員外郎齊臺初建彬曰誰

謂宋遠跂予望之太祖聞之不加罪也

王玄邈仕宋為青州刺史太祖鎮淮陰玄邈啟宋明帝稱太祖有異謀太祖不恨也昇明中太祖引為驃騎司馬玄邈甚懼太祖待之如初

謝朓為宋侍中太祖受禪日朓當解璽朓陽不知曰有何公事傳詔曰解璽授齊王朓曰齊自應有侍中乃枕臥傳詔懼乃使稱疾朓曰我無疾何所道遂朝服出東掖門乃得車還宅是日遂以王儉為侍中解璽既而武

帝請誅肫太祖曰殺之則成其名正應容之度外

武帝時張敬兒坐遣使與蠻中交關伏誅弟恭兒官至員外郎在襄陽聞敬兒敗將數十騎走入蠻中收捕不得後首出帝原其罪

梁高祖舉義兵至京師州牧郡守皆望風降款吳興太守袁昂獨拒境不受命及建康城平昂束身詣闕高祖宥之不問也天監二年以為後軍臨川王參軍事昂奉啓謝曰恩降絕望之辰慶集寒心之日焰灰非喻萑枯

未擬樞衣聚足顛懼不勝臣遍歷三墳備詳六典巡較賞罰之科調檢生死之律莫不嚴五辟於明君之朝峻三章於聖明之世是以塗山始會致防風之誅鄴邑方構有崇侯之伐未有緩憲於斲戮之人奢刑於耐罪之族出萬死入一生如臣者也推恩反罪在臣實大披心瀝血敢乞言之臣東國賤人學行何取既殊鳴鳳直木故無結綬彈冠徒藉羽儀易農就仕往年濫職守秩東隅仰屬龔行風馳電掩當其時也負鼎國者日至執玉

帛者相望獨生在愚臣頓昏大義殉鴻毛之輕忘同德  
之重但三吳險薄五湖交通屢起田儉之變每懼殷通  
之禍空慕君魚保境遂失師消抱器後至者斬臣甘斯  
戮明刑殉衆誰曰不然幸蒙約法之弘承解網羅之宥  
猶當降等薪粲遂乃頓釋鉗赭斂骨吹魂還編黔庶濯  
庇蕩穢入楚遊陳天波既洗雲油遽沐古人有言非死  
之難處死之難臣之所荷曠古不書臣之死所未知何  
地高祖答曰朕遺卿卿無自外

江蓠初為齊建康內史視事暮月義師下次江州遣寧朔將軍劉諶之為郡蓠帥吏民據郡拒之及建康城平蓠坐禁錮俄被原起為後軍臨川王外兵參軍劉季連為益州刺史舉兵叛後降既至詣闕謝高祖引見之季連自東掖門入數步一稽顙以至高祖前笑謂曰卿欲慕劉備而曾不及公孫述豈無卧龍之臣乎季連復稽顙謝赦為庶人

陳伯之初叛入魏後於尋陽擁衆八千復歸既至以為



使持節都督西豫州刺史永新縣侯邑千戶未之任復  
以為通直散騎常侍驍騎將軍

謝覽為侍中頗樂酒因讌席與散騎常侍蕭琛相詆毀  
為有司所奏高祖以覽年少直出為中權長史

張欣泰為武陵內史坐贓私殺人被糾見原還復為直  
閣步兵校尉領羽林監

元帝時劉孝勝初為安西武陵王紀長史蜀都太守高  
祖太清中侯景陷京師紀僭號於蜀以孝勝為尚書僕

射承聖中隨紀出峽口兵敗被執下獄帝尋宥之起為  
司徒右長史

陳高祖初侯瑱為江州刺史鎮豫章討余孝頃留妻子  
於豫章令從弟瀹知後事瀹與其部下侯方兒不協方  
兒怒率所部攻瀹虜掠瑱軍妓妾金玉歸於高祖瑱既  
失根本兵衆皆潰徑歸豫章人拒之乃趨湓城投其將  
焦僧度勸瑱以高祖有大量必能容已乃詣闕請罪高  
祖復其爵位

歐陽頎隨高祖討侯景有功梁元帝以為忠武將軍衡  
州刺史進封始興縣侯時蕭勃在廣州兵彊位重元帝  
深患之遣王琳代刺史琳已至小桂領勃遣其將孫瑒  
監州盡率部下至始興避琳兵鋒頎別據一城不往謁  
勃閉門高壘亦不拒戰勃怒遣兵襲頎盡收其貨財馬  
仗尋赦之還復其所復與結盟荊州陷委質於勃及勃  
渡嶺出南康以頎為前軍都督頓豫章之苦竹灘周文  
育擊破之擒送于高祖釋之深加接待

徐陵初自北齊還太尉王僧辯接待其禮甚厚以陵為尚書吏部郎掌詔誥其年高祖率兵誅僧辯仍進討韋載時任約徐嗣徽承虛襲石頭陵感僧辯舊恩乃往赴約及約等平高祖釋陵尋以為貞威將軍尚書左丞

文帝時華皎之叛也同逆皆誅之唯章昭裕昭達之弟劉廣業廣德之弟曹宣高祖舊臣任蠻奴嘗有密啟於朝廷由是並獲宥王琳據土流周文昭以州從之及高祖踐祚琳遣其將曹慶等攻周廸仍使周文昭將兵犄

角之進為侯安都所敗擒以送都文帝釋之授戎威將軍定州刺史帶西陽武昌二郡太守

謝嘏在梁為建安太守侯景之亂嘏之廣州依蕭勃承聖中元帝徵為五兵尚書辭以道阻轉授智武將軍蕭勃鎮南長史南海太守勃敗還至臨川為周廸所留久之又度嶺之晉安依陳寶應世祖前後頻召之嘏崎嶇寇虜不能自拔及寶應平嘏方詣闕為御史中丞江德操所舉劾文帝不加罪責以為給事黃門侍郎

張種為都官尚書賜無錫嘉興縣秩嘗於無錫見重囚在獄天寒呼出曝日遂失之大笑而不深責

宣帝初殷不佞為東宮通事舍人廢帝嗣立帝為太傅錄尚書輔政甚為朝望所歸不佞素以名節自立久受委東宮乃與僕射到仲舉中書舍人劉師知尚書左丞王暹等謀矯詔出高宗衆人猶豫未敢先發不佞乃馳詣相府面宣勅令相王還第及事發仲舉等皆伏誅高宗雅重不佞特赦之免其官而已

北齊高祖為東魏丞相相府法曹辛子炎諮事云須取署子炎讀署為樹高祖大怒曰小人都不知避人家諱

高祖父名樹

杖之於前行臺郎中杜弼進曰禮二名不偏諱

孔子曰言微不言在言在不言微子炎之罪理或可恕高祖罵之曰眼着人嗔乃復牽經引禮叱令出去弼行十步呼還子炎亦蒙釋宥

王則為荆襄六州都督滑曲之役則為西師圍逼遂棄城奔梁梁放還高祖怒而不責

爾朱文略其妹魏孝莊皇后高祖納之文略以兄文羅卒無後襲梁王以兄文暢事當從坐高祖特寬貸

文襄帝時司馬世雲太尉子如之兄子為潁州刺史侯景反世雲舉州從之時母弟在鄴使傾心附景無復顧望諸將圍景於潁川世雲臨城遙對諸將言甚不遜帝猶以子如恩舊免其諸弟死罪徙於北邊

梁太祖開平二年五月王師敗於潞州壬辰軍前行營都將康懷英孫海金以下主將四十三人於左銀臺門



進狀待罪帝以去年發軍之日不利有違兵法並釋放兼各賜分物酒食勞問

乾化元年八月戊寅幸興安鞠場大教閱帝自指麾無不踊抃坐作進退聲振宮掖立神武統軍丁審衢對御以紅帛囊劍擬乘輿物帝曰宿將也恕之以劉重霸代其任

二年命供奉官朱嶠於河南府宣取先收禁定州進奉官崔騰並僉從一十四人並釋放仍命押領漢送至其鄉

騰唐戶部侍郎潔之子也廣明喪亂客于北諸侯為定州節度使王處存所辟去載領貢獻至闕未幾其師稱兵遂繫之至是帝念賓介之來又已出境特命縱而歸焉

宥過

夫閏以定位割據興邦舍小過舉賢才是其權也雖讐若射鈎惡如盜馬叛國亡命犯禁抵刑猶然宥之况其小者哉所以感彼衆志得其衆力保全宗祀聲振隣敵

能用權也與夫吹毛刺骨棄瑜錄瑕者不侔矣

吳景帝初嗣位詔曰丹陽太守李衡以徃事之嫌自拘

有司夫射鉤斬祛在君為君遣衡還郡勿令自疑丹陽

太守時景帝在郡治衡數以法繩之衡妻習氏每諫衡

無禮而復逆自積嫌逃叛求活以此北歸何面見中國

人乎衡曰計何所出妻曰琅邪王素好慕名方欲自顯

顯求受罪如此乃當逆見優饒非但直活而已

宋高祖初表毛修之為龍驤將軍及劉毅鎮江陵以修

之為軍司馬輔國將軍修之雖為毅將佐而深自結于高祖高祖討毅先遣王鎮惡襲取江陵修之與諮議參軍任集之等並為毅力戰高祖宥之

文帝時垣護之為江夏王義恭征北行參軍北高平太守以載禁物繫尚方久之蒙宥

明帝初在藩以戴明寶為典籤甚為所任及事平坐參掌戎務多納貨賄削所封爵繫尚方尋被宥復為安陸太守

太始初王敬則為直閣將軍坐捉刀入殿啟事繫尚方  
十餘日乃復直閣

劉係宗為竟陵王誕子景粹侍書誕舉兵廣陵城內皆  
死勅沈慶之赦係宗以為東宮侍書

南齊武帝時虞悰為散騎常侍太子右卒永明八年大  
水百官戎服救太廟悰朱衣乘車鹵簿於宣揚門外行  
馬內驅打人為有司所奏特見原

柳世隆為湘州刺史在州立邸治為中丞庾杲之所奏

詔原不問

東昏侯永元元年陳顯達為侍中太尉北伐敗衄御史中丞范岫奏免顯達官朝議優詔答曰昔衛霍出塞往  
往無功馮鄧入關有時虧喪况公規謀肅舉期寄薰深  
見可知難無損威略方振遠圖廓清朔土雖執憲有常  
非所得議顯達表解職不許降號又不許以顯達為都  
督江州軍事江州刺史鎮湓城持節本官如故  
梁高祖天監三年丘遲為永嘉太守在郡不稱職為有

司所糾高祖愛其才寢其奏

蕭穎達為太子左衛率啓乞魚軍稅御史中丞任昉奏請以見事免穎達所居官以俟還第高祖詔原之

陳高祖初受禪梁國子博士領步兵校尉沈文阿輒棄官還武康高祖大怒發使往誅之時文阿宗人沈恪為郡請使者寬其死即面縛鎖致於高祖高祖視而笑曰腐儒復何為者遂赦之

永定元年十一月西討都督周文育侯安都於郢州敗

績囚于王琳二年二月安都等於王琳所逃歸自劾廷尉即日引見並宥之戊寅詔復文育等本官

二年二月南豫州刺史沈泰奔於齊三月甲午詔曰罰不及嗣自古通典罪疑惟輕布在方策沈泰反覆無行遐邇所知昔有微功仍荷朝寄割符名郡推轂累藩漢口班師還居方嶽良田有踰於四百食客不止於三千富貴顯榮正當如此鬼害其盈天奪其魄無故猖狂自投獯醜雖復知人則哲惟帝其難光武有蔽於龐萌魏



武不知於于禁但今朝廷無我負人其部曲妻兒各令復業所在及軍人若有恐脅侵掠者皆以刼論若有男女口為人所藏並許詣臺申訴若樂隨臨川王及節將立功者悉皆聽許

文帝天嘉元年王琳反奉蕭莊為王及兵敗俱奔於齊文帝乃詔蕭莊偽署文武官屬還朝者量加錄序

宣帝時任忠為豫寧太守衡陽內史華皎之舉兵也忠豫其謀及皎平帝以忠先有密啟於朝釋而不問

後主時魯廣達為中領軍隋將韓擒虎之濟江也廣達  
長子世貞在新蔡乃與其弟世雄及所部奔擒虎遣使  
致書以招廣達時屯兵京師乃自劾廷尉請罪後主謂  
之曰世貞雖異路中大夫公國之重臣吾所恃賴豈得  
自同嫌疑之間乎加賜黃金即日還營

北齊高祖義旗初起李義深為龍驤將軍歸高祖於信  
都以為大行臺郎中中興初除平南將軍鴻臚少卿義  
深見爾朱兆兵盛遂叛高祖奔之兆平高祖恕其罪以

為大丞相府記室參軍

陳元康為相府功曹參軍時高仲密之叛高祖知其繇  
崔暹故也將殺暹世宗匿而為之諫請高祖曰我為捨  
其命須與苦手世宗乃出暹而謂元康曰卿若使崔得  
杖無相見也暹在廷解衣將受罰元康趨入歷階而陛  
且言大王方以天下付大將軍有一崔暹不能容忍耶  
高祖從而宥焉

文宣帝天保中盧潛為左民郎中坐譏議魏書與王松

年李庶等俱被禁止會清河王岳將兵救江陵特舍潛以為岳行臺郎還遷中書侍郎

武成帝時王則為徐州刺史梁遣貞陽侯淵明堰水灌城則固守歷時而取受狼籍錄送晉陽帝怒其罪

### 悔過

古人有言曰改過不吝蓋所以懲往者之失杜將來之非也自卯金絕紐吳蜀爭雄洎宋齊以還南北競爽至於興戎創業嚮明決政謀有失策事或過舉乃至暴怒

中發斥棄仁賢率意肆刑外失羣望而能深引前咎勿憚改作雖有發矢不追之機噬臍無及之悔然亦來者之可圖也為人君者能保其國鮮不繇斯而已矣

蜀先主初入蜀於涪大會置酒作樂謂龐統曰今日之會可謂樂矣統曰伐人之國而以為歡非仁者之兵也先主醉怒曰武王伐紂前歌後舞非仁者耶卿言不當宜速起出於是統逡巡引退先主尋悔請還統復故位初不顧謝飲酒自若先主謂曰向者之論阿誰為失統

對曰君臣俱失先主大笑宴樂如初

章武元年先主將伐吳黃權諫曰吳人悍戰又水軍順  
流進易退難臣請為先驅以嘗寇陛下宜為後鎮先主  
不從以權為鎮北將軍督江北軍以防魏師先主自在  
江南及先主軍敗引退而道隔絕權不得還故率所將  
領降于魏有司執法白收權妻子先主曰孤負黃權權  
不負孤也待之如初

吳大帝初為吳王黃武中騎都尉虞翻性疏直權積怒

非一遂徙交州翻雖在徙棄心不忘國常憂五谿宜討  
以遼東海絕聽人使來屬尚不足取令去人財以求馬  
既非國利又恐無獲欲諫不敢作表以示呂岱岱不報  
為愛憎所白復徙蒼梧猛陵後權遣將士至遼東於海  
中遭風多沒失權悔之乃令曰昔趙簡子稱諸君之唯  
唯不如周舍之諤諤虞翻亮直善於盡言國之周舍也  
前使翻在此此役不成促下問交州翻若尚存者給其  
人船發遣還都若已亡者送喪還本郡使兒子仕官會

翻已終歸葬舊墓妻子乃得還

嘉禾元年十月魏遼東太守公孫淵遣使稱藩於權權遣張彌許晏至遼東拜公孫淵為燕王婁侯張昭切諫權卒遣之昭忿言之不用稱疾不朝權恨之土塞其門昭又於內以土封之淵果殺彌晏權數慰謝昭昭固不起權因出過其門呼昭辭疾篤權燒其門欲以恐之昭更閉戶權使人滅火住門良久昭諸子共扶昭起權載以復還官深自克責



吳呂壹嘉禾中為校事權信任之壹性苛慘用法深刻

太子登數諫權不納大臣繇是莫敢言後壹姦罪發露

伏誅權引責躬

一云典校呂壹竊弄權柄擅作威福大將軍陸遜與太常潘濬同心憂之言至

流涕後權誅壹深以自責

陸遜赤烏中為荊州牧太子有不安之議遜上疏陳太

子正統宜有金石之固魯王藩臣當使寵秩有差彼此

得所上下獲安謹叩頭流血以聞書三四上及帝詣都

欲口論適庶之分既不聽許而遜外甥顧譚顧承姚信

並以親附太子枉見流徙太子太傅吳粲坐數與遜交書下獄死權遣中使責讓遜遜憤恚致卒後遜子抗為中郎將屯柴桑太元元年就都治病病瘥當還權涕泣與別謂曰吾前聽用讒言與汝父大義不篤以此負汝前後所問一焚滅之莫令人見也

宋文帝元嘉二十七年十二月魏太武率大衆至瓜步聲欲渡江都下震懼咸荷擔而立始議北侵朝士多有不同至是帝登烽火樓極望不悅謂江湛曰北伐之計

同議者少今日士庶勞怨不得無慙胎大夫之憂在予過矣

明帝泰始二年正月徐州刺史薛安都既降魏後遣使歸順帝遣張永率軍迎之尚書右僕射蔡興宗曰安都遣使歸順此誠不虛今宜撫之以和即安所益不過須單使及咫尺書耳若以重兵迎之勢必疑懼或能招引北兵為患不測時張永已行不見從安都聞大軍過淮嬰城自守要取索虜永戰大敗又值寒雪死者十八九

遂失淮北四州永敗問至帝在乾明殿先召司徒建安王休仁又名興宗謂休仁曰吾慙蔡僕射以敗書示興宗曰我愧卿

南齊武帝永明元年五月誅車騎將軍張敬兒初敬兒妻謂敬兒曰昔時夢手契如火而君得南陽郡元徽中夢半身契而君得本州今復夢舉體契矣有閹人聞其言說之事達帝敬兒又遣使與蠻中交關帝疑其有異志勅朝臣華林八關齋於坐收敬兒誅之後數年帝與豫

章王嶷三日曲水內晏舩船流至御坐前覆沒帝繇是言及敬兒悔殺之

孫惠素武帝時為少府卿勅市銅官碧青一千二百觔供御盡用錢六十五萬有讒惠素納利武帝怒勅尚書評價貴二十八萬餘有司奏伏誅死後家徒四壁帝後知無罪甚悔恨之

梁元帝承聖中以荆湘疑上命領軍將軍王僧辯及鮑泉討之僧辯謂泉曰非精兵一萬不足以制之我竟陵

甲士已遣名之帝性嚴忌微聞其言以為遷延不肯去  
稍已含怒及僧辯將入謂泉曰我先發言君可見係泉  
又許之及見帝帝迎問曰卿已辦乎何日當發僧辯具  
對如向所言帝大怒案劔厲聲曰卿憚行耶因起入內  
泉震怖失色竟不敢言頃臯遣左右數十人收僧辯既  
至謂曰卿拒命不行是欲同賊今唯有死耳僧辯對曰  
僧辯食祿既深憂責實重今日就戮豈敢懷恨但恨不  
見老母帝因斫之中其左脾音脾流血至地僧辯悶絕久

之方蘇即送付廷尉並收其子姪並皆繫之會岳陽王軍襲江陵人情搔擾未知其備帝遣左右往獄問計於僧辯僧辯具陳方略帝即赦為城內都督

後梁宣帝初為岳陽王鎮襄陽與西魏柱國于謹伐江陵平之帝將尹德毅說帝請于謹等為歡豫伏武士因而斃之分命果毅掩其營壘斬馘逋醜帝不從謂德毅曰卿之此策非不善也然魏人待我甚厚豈可背德若遽為卿計則鄧祁侯所謂人將不食吾餘也既而闔城

長幼被虜入關又失襄陽之地帝乃追悔曰恨不用尹德毅之言以至於是

陳宣帝大建中問五兵尚書毛喜曰我欲進兵彭汴於卿意如何喜對以不若安民保境寢兵復約帝不從後吳明徹陷周帝深悔之謂袁憲曰不用毛喜計遂令至此朕之過也

初吳明徹北伐克捷帝以為河南可定通事舍人蔡景歷諫稱師老將驕不宜過窮遠略帝惡其沮衆大怒出



為豫章內史又徙會稽及明徹敗帝追憶景歷前言即日  
追還復以為征南鄱陽王諮議參軍數日遷貞外散騎  
常侍兼御史中丞復本封爵

北齊神武將圖關右與鎮北將軍段榮密謀榮盛稱未  
可及渭曲失利神武悔之曰吾不用段榮之言以至於  
此

陳元康為尚書右丞初從神武破周太祖於却山大會  
諸將議進退策咸以為野無青草人馬疲瘦不可遠追

元康曰兩雄交爭歲月已久今得大捷便是天授時不可失必須乘勝追之神武曰若遇伏兵孤何以濟元康曰王前沙苑還軍彼尚無伏今奔敗若此何能遠謀若捨而不追必成後患神武竟不從及疾篤謂文襄曰邛山之戰不用元康之言方貽汝患以此為恨死不瞑目文宣帝天保初中書舍人元文遙忽有中旨幽執竟不知所繇如此積年帝後自幸禁獄執手愧謝親解所着金帶及御服賜之即日起為尚書祠部郎中

梁太祖初為梁王唐天祐二年十月自襄州引軍繇光  
州路趨淮南將發判官敬翔切諫請班師以全軍勢帝  
不聽及次于棗陽遇大雨頗阻師行之勢軍至壽春壽  
人堅壁清野以待帝軍帝乃退舍於正陽十一月大軍  
北濟帝至汝陰深悔淮南之行

冊府元龜卷二百九